



Մ Ա Յ Ր Ա Թ Ո Ռ Ո Ւ Մ

Փետրվարի 13-ին, Վարդանանց զորավարաց 1.036 վկայից ազգային և կրոնական տոնի օրը, հավատացյալների խուռն բազմության ներկայությամբ Ս. Էջմիածնի Մայր Տաճարում մատուցվեց հանդիսավոր սուրբ պատարագ: Պատարագին էր գերաշնորհ Տ. Սահակ եպիսկոպոսը:

Սուրբ պատարագից հետո վանքի միաբանությունը այցելելով առանձին-առանձին շնորհավորեց այն միաբաններին, որոնց տոնն էր այդ օրը, իսկ երեկոյան հավաքվելով մի ընդհանուր սեղանի շուրջը, եղբայրական ուրախ ու ջերմ մթնոլորտում նշեցին կրոնական-ազգային այդ կարևոր տոնը: Մյուս օրը, փետրվարի 13-ին, Մայր Տաճարում մատուցվեց հանդիսավոր սուրբ պատարագ և կատարվեց հոգեհանգիստ մեռելոց հիշատակին:

Փետրվարի 13-ի երեկոյան աննման խորհրդավորությամբ կատարվեց Տյառնընդառաջի տոնակատարության կապակցությամբ նախատոնակ: Մայր Տաճարում շարժվելու հնարավորություն չկար: Միաբանությունը, զգեստավորված, վառվող մոմերը ձեռքներին, բոլորել էին Ս. Իշման սեղանը, խնկի ծուխը մշուշապատել էր Տաճարը, տեղի էր ունենում հանդիսավոր արարողությունը, իսկ օդում լսելի էին հավատացյալների աղոթքի մրմունջները:

Երեկոյան ժամերգությունը վերջանալուց հետո հավատացյալները խումբ-խումբ դուրս են գալիս վառված մոմերը ձեռքներին: Տաճարը դատարկվում է, իսկ հետո, այստեղ այնտեղ, խարույկներ են երևում: Ժողովուրդը հազարամյակներ հետո դեռ չի մոռացել

անհիշելի ժամանակներից ժառանգած իր ծիսական հնամենի, հեթանոս, բայց արդեն քրիստոնեացած նվիրական ավանդությունները:

Հաջորդ օրը հանդիսավոր պատարագ է մատուցվում Ավագ սեղանի վրա:

Փետրվարի 22-ին, կիրակի օրը, Երևանի Ս. Սարգիս եկեղեցում հանդիսավոր սուրբ պատարագի ընթացքում, բազմաթիվ հավատացյալների ներկայությամբ կատարվեց նորոգ հանգուցյալ արժանապատիվ Տ. Վարդան քահանա Վարդեբեայանի վերջին օծումը և հոգեհանգիստը: Վերջին օծման արարողությունը, Վեհափառ Հայրապետի տնօրինությամբ, կատարեց Մայր Տաճարի միաբանությունից ուղարկված գերաշնորհ Տ. Սահակ եպիսկոպոսը:

Սրբազանը մի սրտառուլ քարոզով վեր հանեց հանգուցյալ արժանապատիվ հոր առաքինի վարքն ու բարեմասնությունները, մխիթարեց հանգուցյալի հարազատներին հոգեսփոփիչ խոսքերով: Այնուհետև Վեհափառ Հայրապետի թույլտվությամբ հանգուցյալի մարմինը տեղափոխվեց Էջմիածին և միաբանության ուղեկցությամբ, հանդիսավոր հոգեհանգստից հետո, ամփոփվեց Մայր Աթոռի միաբանության գերեզմանատանը՝ Ս. Գայանեի վանքի հյուսիսակողմը: Խոսվեցին հուզիչ դամբանականներ:

Մարտի 1-ին, Հայկական ՍՍՌ աշխատավորների դեպուտատների տեղական Սովետների ընտրությունների օրը, Ս. Էջմիածնի միաբանությունը, կատարելով իր քաղաքացիական սրբազան պարտքը, մասնակցեց ընտրություններին:

Ապրիլի 11-ին, շաբաթ օրը, Մայր Տաճարում մատուցվեց սուրբ պատարագ, ձեռնադրության խորհուրդ կատարելու համար: Պատարագի ընթացքում, Վեհափառ Հայրապետի բարեհաճ կարգադրությամբ, գերաշնորհ Տ. Սահակ եպիսկոպոս Տեր-Հովհաննիսյանը Մայր Աթոռի դպրապետ տիրացու Հակոբ Հակոբյանին ձեռնադրեց ավագ սարկավագ: Միևնույն օրը սարկավագության աստիճան ստացավ Կիրովաբադի (Բաքվի թեմ) համար քահանայության պատրաստվող, բարձրագույն կրթության տեր Ռաֆայել Խաչատրյանը:

Ձեռնադրության խորհրդին ներկա էին ողջ միաբանությունը, Հոգևոր Ճեմարանի ուսանողությունը, դասախոսները և հավատացյալ ժողովրդի հոծ բազմություն:

Ապրիլի 12-ին, նոր Կիրակի (Կրկնազատիկ), Մայր Տաճարում մատուցվեց հանդի-

սավոր սուրբ պատարագ: Հավատացյալների խումն բազմության ներկայությամբ, նախորդ օրը սարկավագության աստիճան ստացած շնորհունակ Ռաֆայել Խաչատրյանը ձեռնադրվեց քահանա՝ վերանվանվելով Գարեգին:

Միևնույն օրը, սուրբ պատարագից հետո, ամբողջ միաբանության մասնակցությամբ կատարվեց հոգեհանգիստ՝ ի հիշատակ Հայրենական Մեծ պատերազմի բոլորավոր նահատակաց:

Ապրիլի 19-ին, Աշխարհամատրան (Կանաչ կիրակի) տոնի օրը Մայր Տաճարում մատուցվեց հանդիսավոր սուրբ պատարագ: Պատարագին էր հոգեշնորհ Տ. Կոստանդին աբեղա Թառնյանը: Տաճարի ներսն ու բակը լիքն էին ուխտավորների խումն բազմությամբ: Երգում էր քառաձայն երգեցիկ խումբը:

